

Na osnovu čl. 1., 4. i 8. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11) i u skladu sa čl. 2. i 4. Odluke o obimu, uvjetima i vremenskom rasporedu otvaranja tržišta električne energije u Bosni i Hercegovini (“Službeni glasnik BiH”, br. 48/06 i 77/09), na sjednici Državne regulatorne komisije za električnu energiju, održanoj 14. novembra 2013. godine, donijet je

PRAVILNIK

O SNABDIJEVANJU KUPACA ELEKTRIČNOM ENERGIJOM U BRČKO DISTRIKTU BOSNE I HERCEGOVINE

I OPĆE ODREDBE

Član 1. *(Predmet)*

Ovim pravilnikom se definira način snabdijevanja kupaca na tržištu električne energije u Brčko Distriktu Bosne i Hercegovine.

Član 2. *(Cilj)*

Cilj donošenja ovog pravilnika je razvoj i funkcioniranje tržišta električne energije u Brčko Distriktu Bosne i Hercegovine u okviru jedinstvenog tržišta električne energije u Bosni i Hercegovini.

Član 3. *(Definicije)*

“**Balansno odgovorna strana**” označava učesnika na tržištu koji preuzima finansijsku odgovornost za svoj neto debalans (balansiranje proizvodnje, potrošnje i razmjene) ili za neto debalans grupe tržišnih učesnika, uključujući i nju.

“**Javni snabdjevač**” označava elektroenergetski subjekat koji obavlja snabdijevanje električnom energijom kao javnu uslugu, tj. snabdijevanje u okviru univerzalne usluge, i snabdijevanje u krajnjoj nuždi.

“**Kvalificirani kupac**” označava kupca električne energije koji može slobodno kupovati električnu energiju od snabdjevača po svom izboru.

“**Mali kupac**” označava male industrijske i komercijalne kupce električne energije čiji su objekti priključeni na distributivni sistem naponskog nivoa nižeg od 1 kV i koji imaju manje od 50 zaposlenih i čiji ukupan godišnji prihod ne prelazi 10 miliona KM.

“**Nekvalificirani (tarifni) kupac**” označava kupca kome se električna energija isporučuje po reguliranim cijenama (tarifama).

“**Obaveza javne usluge**” označava obavezu energetske subjekata da određene energetske djelatnosti obavljaju kao javnu uslugu dostupnu svim kupcima na određenom području uz ispunjavanje određenih standarda koji se mogu odnositi na sigurnost, kontinuitet i kvalitet snabdijevanja, cijene isporuke, zaštitu okoline, uključujući energetske efikasnost, proizvodnju iz obnovljivih izvora i klimatske promjene.

“**Snabdijevanje u krajnjoj nuždi**” označava poseban metod prodaje električne energije u okviru snabdijevanja električnom energijom koja se obavlja kao javna usluga, osiguranjem

prava na snabdijevanje električnom energijom prema reguliranim uvjetima onim kupcima koji su izgubili snabdjevača pod specifičnim okolnostima.

“**Univerzalna usluga**” označava pravo domaćinstava i malih kupaca na snabdijevanje električnom energijom određenog kvaliteta po ekonomski opravdanim, jednostavno i lako uporedivim i transparentnim cijenama.

II SNABDIJEVANJE KUPACA ELEKTRIČNOM ENERGIJOM

Član 4.

(Snabdijevanje električnom energijom)

Djelatnost snabdijevanja električnom energijom u Brčko Distriktu BiH mogu obavljati svi subjekti koji posjeduju odgovarajuću licencu (dozvolu) za snabdijevanje kupaca električnom energijom izdatu od Državne regulatorne komisije za električnu energiju (u daljnjem tekstu: DERK), Regulatorne komisije za energiju u Federaciji Bosne i Hercegovine ili Regulatorne komisije za energetiku Republike Srpske.

Član 5.

(Otvorenost tržišta)

- (1) Svi kupci u Brčko Distriktu BiH su kvalificirani kupci i imaju mogućnost slobodnog izbora snabdjevača električnom energijom.
- (2) Izuzetno od stava (1) ovog člana, kupci iz kategorije potrošnje domaćinstva i mali kupci pravo na slobodan izbor snabdjevača električnom energijom mogu koristiti od 1. januara 2015. godine.

Član 6.

(Javni snabdjevač)

Javni snabdjevač je snabdjevač koji ima obavezu da snabdijeva električnom energijom sve kvalificirane kupce koji u roku iz člana 24. ovog pravilnika ne izaberu snabdjevača po svom izboru.

Član 7.

(Univerzalna usluga)

- (1) Kupci iz kategorije domaćinstva i mali kupci koji ne izaberu snabdjevača na tržištu imaju pravo da kupuju električnu energiju od javnog snabdjevača, tj. da se snabdijevaju električnom energijom određenog kvaliteta po ekonomski opravdanim, jednostavno i lako uporedivim i transparentnim cijenama u okviru pružanja univerzalne usluge.
- (2) DERK određuje cijene snabdijevanja u okviru univerzalne usluge.
- (3) Izuzetno od stava (2) ovog člana, do usklađivanja metodologije za izradu tarifa u Brčko Distriktu BiH, cijene snabdijevanja malih kupaca u okviru univerzalne usluge određuje pružalac te usluge, uz nadzor DERK-a.

Član 8.

(Snabdijevanje u krajnjoj nuždi)

- (1) Snabdjevač u slučaju krajnje nužde preuzima snabdijevanje kupaca iz kategorije domaćinstva i malih kupaca električnom energijom bez podnošenja posebnog zahtjeva,

ako njihov snabdjevač napusti tržište električnom energijom čime gube snabdijevanje električnom energijom i ostaju bez bilo kog oblika zaštite.

- (2) Pružalac usluge snabdijevanja u krajnjoj nuždi određuje cijene svojih usluga, uz nadzor DERK-a.

Član 9. **(Ugovori)**

Radi snabdijevanja kupca električnom energijom zaključuju se Ugovor o priključenju, Ugovor o snabdijevanju i Ugovor o korištenju mreže.

Član 10. **(Ugovor o snabdijevanju)**

- (1) Kupac i snabdjevač, kojeg on slobodno izabere, zaključuju ugovor o snabdijevanju električnom energijom te slobodno ugovaraju količinu, cijenu i period snabdijevanja.
- (2) Ugovor o snabdijevanju obavezno sadrži:
 - a) podatke o ugovornim stranama
 - b) predmet ugovora
 - c) podatak o priključnoj snazi odobrenoj elektroenergetskom saglasnošću,
 - d) podatke o primopredajnom i mjernom mjestu,
 - e) količinu električne energije i snage sa dopuštenim odstupanjima, način postupanja u slučaju odstupanja od ugovorenih količina, kao i mjesečnu dinamiku preuzimanja (samo za kupce kojima se obračunska snaga utvrđuje mjerenjem), ako je primjenljivo,
 - f) adresu dostave računa,
 - g) uvjete u vezi kvaliteta električne energije u tački napajanja, utvrđene općim uvjetima i drugim propisima ili povećani nivo kvaliteta,
 - h) kategoriju potrošnje i tarifnu grupu kupaca kojoj kupac pripada i obračunske elemente grupe po tarifnom sistemu (za nekvalificirane kupce),
 - i) jedinične cijene električne energije (za kvalificirane kupce),
 - j) način obračuna i plaćanja,
 - k) odredbe o kamatama,
 - l) period važenja ugovora,
 - m) prava i obaveze ugovornih strana, naročito u vezi sa promjenom adrese, odnosno prijavom i odjavom mjernog mjesta, razlogom i rokom obustave isporuke električne energije, prigovorom na račun za električnu energiju i korekcijom obračuna,
 - n) odgovornost za neizvršavanje, odnosno neuredno izvršavanje obaveza iz ugovora,
 - o) odredbe o pristupu i korištenju mreže, ukoliko kupac putem snabdjevača regulira pristup,
 - p) uputu o rješavanju sporova,

- r) način promjene cijena električne energije, te način na koji je snabdjevač dužan informirati krajnjeg kupca u slučaju promjene cijena,
- s) odredbu kojom se propisuje da se za pitanja koja nisu regulirana ugovorom primjenjuju odredbe općih uvjeta, koje će snabdjevač učiniti dostupnim krajnjem kupcu prije zaključenja ugovora, i
- t) prestanak ugovora i otkazni rok.

Član 11.
(Ugovor o korištenju mreže)

- (1) Ugovorom o korištenju mreže reguliraju se uvjeti pristupa i korištenja distributivne mreže.
- (2) Operator distributivnog sistema i snabdjevač zaključuju ugovor o korištenju mreže, a izuzetno to može učiniti i kupac iz člana 14. stav (2) ovog pravilnika.
- (3) Ugovor o korištenju mreže sadrži:
 - a) podatke o ugovornim stranama,
 - b) predmet ugovora,
 - c) broj i datum zaključenja ugovora o priključenju,
 - d) podatak o priključnoj snazi odobrenoj elektroenergetskom saglasnošću,
 - e) podatke o mjernom mjestu i sadržaj mjernog sloga,
 - f) uvjete pristupa mjernom mjestu, uređajima i instalacijama u objektima krajnjeg kupca i uvjete i način očitavanja mjernih uređaja,
 - g) način i adresu za dostavu računa,
 - h) količinu električne energije i snage za isporuku, u skladu sa ugovorom o snabdijevanju, dopuštena odstupanja od ugovorenih količina i način postupanja u slučaju odstupanja od ugovorenih količina,
 - i) uvjete u vezi kvaliteta električne energije u tački napajanja,
 - j) kategoriju potrošnje i tarifnu grupu kupaca,
 - k) način obračuna i plaćanja naknade za korištenje mreže,
 - l) obračunski period i odredbe o kamatama,
 - m) odgovornost za pričinjenu štetu,
 - n) razloge zbog kojih operator distributivnog sistema može ograničiti pristup mreži,
 - o) razloge zbog kojih operator distributivnog sistema može ograničiti i obustaviti isporuku električne energije,
 - p) način izvještavanja, razmjene podataka i povjerljivost određenih podataka dobijenih neposredno ili posredno tokom realizacije ugovora,
 - r) upute o rješavanju sporova,
 - s) period važenja ugovora,
 - t) prestanak ugovora i otkazni rok.

- (4) Ugovor o korištenju mreže sa kupcem na srednjem naponu i proizvođačem električne energije, osim odredbi iz stava (3) ovog člana, sadrži i:
 - a) nivo dopuštenog povratnog utjecaja objekata na distributivnu mrežu, i
 - b) način prikupljanja, provjere i dostave mjernih i obračunskih podataka.
- (5) Snabdjevač koji koristi distributivnu mrežu za transport električne energije, radi potrošnje van distributivnog područja operatora distributivnog sistema, zaključuje sa operatorom distributivnog sistema ugovor o korištenju mreže koji sadrži neophodne elemente iz st. (3) i (4) ovog člana.
- (6) Za krajnje kupce kojima se obračunska snaga utvrđuje mjerenjem, ukoliko je izmjerena vršna snaga u obračunskom periodu veća od odobrene vršne snage iz elektroenergetske saglasnosti, obračun naknade za snagu vrši se na osnovu izmjerene snage uvećane za razliku između izmjerene snage i vrijednosti odobrene vršne snage.

Član 12.
(Ograničenja)

- (1) Ugovor o snabdijevanju, ugovor o priključenju i ugovor o korištenju mreže ne mogu sadržavati odredbu koja na bilo koji način ograničava kvalificiranog kupca u izboru snabdjevača ili mu nameće posebnu naknadu u slučaju promjene snabdjevača.
- (2) Odredbe ugovora o snabdijevanju i ugovora o korištenju mreže moraju biti u skladu sa zakonom, odredbama mrežnih i tržišnih pravila i općih uvjeta za isporuku i snabdijevanje električnom energijom koji se primjenjuju u Brčko Distriktu BiH.
- (3) Snabdjevač koji ima namjeru da snabdijeva kupce u Brčko Distriktu BiH dužan je izraditi tipski ugovor o snabdijevanju električnom energijom i dostaviti ga DERK-u.

III PRAVA I OBAVEZE KVALIFICIRANOG KUPCA

Član 13.
(Prava kvalificiranog kupca)

- (1) Kvalificirani kupac može iskoristiti svoje pravo izbora i zaključiti ugovor o snabdijevanju sa snabdjevačima na tržištu u skladu sa članom 10. ovog pravilnika
- (2) Kvalificirani kupac ima pravo da bez naknade promijeni snabdjevača u skladu sa ovim pravilnikom.
- (3) Kvalificirani kupac, koji je slobodno izabrao snabdjevača na tržištu, ima pravo zaključiti ugovore sa više snabdjevača, ukoliko postoji mogućnost utvrđivanja obračunskih veličina, što potvrđuju operator distributivnog sistema i balansno odgovorna strana.
- (4) Kupac iz kategorije domaćinstva i mali kupac ima pravo na snabdijevanje u krajnjoj nuždi, u skladu sa članom 8. ovog pravilnika.

Član 14.
(Obaveze kvalificiranog kupca)

- (1) Obaveza kvalificiranog kupca koji slobodno izabere snabdjevača je da zaključi ugovor o snabdijevanju.
- (2) Ugovor o korištenju mreže zaključuju operator distributivnog sistema i snabdjevač, a izuzetno to može učiniti i kupac koji je priključen na naponski nivo 10 kV ili 35 kV koji ima zaključen ugovor o snabdijevanju sa više snabdjevača.

- (3) Kvalificirani kupac obavezan je:
- a) da se pridržava odredbi ugovora o snabdijevanju,
 - b) da se pridržava ugovorenih količina električne energije i
 - c) da redovno izmiruje finansijske obaveze preuzete zaključenim ugovorima.

IV PRAVA I OBAVEZE SNABDJEVAČA

Član 15. ***(Prava snabdjevača)***

Snabdjevač električnom energijom ima pravo da snabdijeva kvalificirane kupce u skladu sa važećim propisima i uvjetima propisanim licencom za obavljanje djelatnosti.

Član 16. ***(Obaveze snabdjevača)***

Snabdjevač kvalificiranih kupaca i javni snabdjevač, svaki u okviru svog djelovanja, obavezan je da:

- a) preduzima mjere radi postizanja sigurnog, kontinuiranog i kvalitetnog snabdijevanja kupaca električnom energijom,
- b) uredno i blagovremeno obavijesti operatora sistema koji upravlja mrežom na koju su priključeni objekti kvalificiranog kupca, u skladu sa mrežnim pravilima, i balansno odgovornu stranu, u skladu sa tržišnim pravilima, o ugovorenim količinama električne energije, uključujući i naknadne izmjene, dopune i produženja važnosti i prestanak ugovora o snabdijevanju,
- c) redovno dostavlja potrebne podatke nosiocu licence za obavljanje djelatnosti distribucije ili prijenosa električne energije predviđene odredbama ugovora o korištenju mreže i ugovora o snabdijevanju,
- d) prije zaključivanja ugovora o snabdijevanju obavijesti kvalificiranog kupca o vrstama usluga koje se naplaćuju po svim osnovama, kao i o eventualnim drugim uvjetima pod kojima vrši snabdijevanje električnom energijom,
- e) uz račun za isporučenu električnu energiju informira kupca o udjelu pojedinih izvora energije u ukupno prodatoj električnoj energiji tog snabdjevača u prethodnoj godini,
- f) informira kupce o načinu promjene snabdjevača, te da izradi i objavi standardne obrasce zahtjeva za zaključenje, produženje i raskid ugovora o snabdijevanju,
- g) informira kupce o načinu i postupku rješavanja prigovora kupca u slučaju kada snabdjevač, po mišljenju kupca, ne ispunjava ugovorne obaveze,
- h) izvršava sve druge obaveze propisane uvjetima licence za obavljanje djelatnosti i općim uvjetima za isporuku i snabdijevanje električnom energijom.

Član 17.

(Posebne obaveze javnog snabdjevača)

- (1) Javni snabdjevač ima obavezu snabdijevati kvalificiranog kupca koji nije izabrao svog snabdjevača, u skladu sa važećim propisima i uvjetima propisanim licencom za obavljanje djelatnosti.
- (2) Javni snabdjevač snabdijeva kvalificiranog kupca iz stava (1) ovog člana po cijeni usluge snabdijevanja koju utvrđuje javni snabdjevač, u skladu sa ovim pravilnikom.
- (3) Snabdjevač električnom energijom nekvalificiranih kupaca vodi troškove koji se odnose na uslugu javnog snabdjevača odvojeno od troškova koji se odnose na snabdijevanje nekvalificiranih (tarifnih) kupaca.

V CIJENE I TROŠKOVI SNABDIJEVANJA

Član 18.

(Cijena električne energije javnog snabdjevača)

Cijena po kojoj javni snabdjevač isporučuje električnu energiju kvalificiranim kupcima obuhvaća troškove mrežarina, pomoćnih usluga, snabdijevanja, električne energije i svih drugih troškova koji se odnose na proces snabdijevanja, uključujući i naknadu za podsticanje proizvodnje električne energije iz obnovljivih izvora i efikasne kogeneracije.

Član 19.

(Trošak električne energije)

- (1) Za utvrđivanje troška električne energije iz člana 18. ovog pravilnika koristit će se sljedeći izraz:

$$p_{kk} = K * p_d$$

gdje je :

p_d – prosječna nabavna cijena električne energije za kupce iz kategorije domaćinstva u Brčko Distriktu BiH, određena u skladu sa metodologijom za izradu tarifa u Brčko Distriktu BiH,

K – koeficijent korekcije cijene električne energije koji odražava uvjete (okolnosti) na tržištu električne energije u BiH.

- (2) Koeficijent K određuje DERK.

Član 20.

(Trošak mrežarina i pomoćnih usluga)

- (1) Trošak usluge korištenja prijenosne mreže (prijenosna mrežarina), trošak rada nezavisnog operatora sistema i trošak pomoćnih usluga određuje DERK u skladu s Metodologijom za izradu tarifa za usluge prijenosa električne energije, nezavisnog operatora sistema i pomoćne usluge.
- (2) Trošak usluge korištenja distributivne mreže u Brčko Distriktu BiH (distributivna mrežarina) određuje DERK na osnovu metodologije za izradu tarifa u Brčko Distriktu BiH.

Član 21.
(Trošak snabdijevanja)

Trošak snabdijevanja električnom energijom kvalificiranih kupaca koji obračunava javni snabdjevač odražava uvjete na tržištu električne energije i uporediv je sa troškovima drugih snabdjevača iz okruženja.

Član 22.
(Određivanje cijene električne energije javnog snabdjevača)

- (1) Javni snabdjevač određuje cijene po kojima isporučuje električnu energiju kvalificiranim kupcima u Brčko Distriktu BiH, osim za snabdijevanje koje obavlja u okviru univerzalne usluge.
- (2) Cijene snabdijevanja određuju se na transparentan način, javno se objavljuju i dostupne su svim zainteresiranim subjektima.
- (3) U slučaju da cijene koje je utvrdio javni snabdjevač nisu određene na transparentan način ili predstavljaju oblik netržišnog ponašanja, DERK može osporiti tako utvrđene cijene.

Član 23.
(Obaveza informiranja kupca)

Snabdjevač električnom energijom obavezan je da direktno informira kupca, sa kojim ima zaključen ugovor o snabdijevanju, o promjeni cijena električne energije i drugih uvjeta prodaje u roku koji ne može biti kraći od 30 dana prije početka primjene izmijenjenih (novih) cijena ili uvjeta prodaje.

VI PROMJENA SNABDJEVAČA

Član 24.
(Promjena snabdjevača)

- (1) Svi kvalificirani kupci u Brčko Distriktu BiH koji u roku od 90 dana, počev od 1. januara 2014. godine, ne izaberu svog snabdjevača, nastaviti će se snabdijevati od javnog snabdjevača.
- (2) U slučaju da kvalificirani kupac promijeni snabdjevača električnom energijom, novi snabdjevač dužan je da obavijesti prethodnog snabdjevača kao i operatora distributivnog sistema u Brčko Distriktu BiH o nastaloj promjeni.

Član 25.
(Postupak promjene snabdjevača)

- (1) Kvalificirani kupac, koji namjerava da promijeni snabdjevača, dužan je da novom snabdjevaču, od kojeg želi da se snabdijeva, podnese zahtjev na obrascu propisanom od snabdjevača.
- (2) Popunjen obrazac zahtjeva iz stava (1) ovog člana sadrži i izjavu, odnosno ovlaštenje novom snabdjevaču da preduzima potrebne radnje u cilju promjene snabdjevača.
- (3) Novi snabdjevač, po ovlaštenju iz stava (2) ovog člana, dostavlja obavijest o prestanku ugovora postojećem snabdjevaču najkasnije sedam dana od dana prijema zahtjeva iz stava (1) ovog člana.

- (4) Novi snabdjevač, dužan je da operatoru sistema podnese zahtjev za promjenu snabdjevača, na obrascu propisanom od operatora sistema, najkasnije sedam dana od dana prijema zahtjeva iz stava (1) ovog člana.
- (5) Snabdjevač koji dobije obavijest o prestanku ugovora o snabdijevanju iz stava (3) ovog člana, dužan je, da u roku od sedam dana od dana prijema obavijesti, podatke potrebne za okončanje postupka prestanka ugovora stavi na raspolaganje operatoru sistema i novom snabdjevaču.
- (6) Operator distributivnog sistema dužan je, da u roku od deset dana od dana prijema zahtjeva iz stava (4) ovog člana, odobri zahtjev, odnosno da u istom roku obavijesti novog snabdjevača o potrebnim izmjenama u zahtjevu, ukoliko postoji neusklađenost sa ugovorom o priključenju i ugovorom o korištenju mreže, a postojećeg snabdjevača sa kojim ugovor prestaje, obavijesti o promjeni snabdjevača i o vremenu prestanka ugovora.
- (7) Operator distributivnog sistema dostavlja prethodnom i novom snabdjevaču podatke o stanju obračunskih veličina na mjernim uređajima krajnjeg kupca u vrijeme početka primjene novog ugovora, u roku od 3 dana od dana očitavanja obračunskog mjernog uređaja.
- (8) Datum promjene snabdjevača, odnosno dan početka primjene novog ugovora je dan očitavanja mjernog uređaja.
- (9) Kvalificirani kupac dužan je da, prilikom promjene snabdjevača, regulira finansijske obaveze prema prethodnom snabdjevaču.
- (10) Novi snabdjevač dužan je da osigura usklađenost ugovora o snabdijevanju, ugovora o priključenju, ugovora o korištenju mreže i pripadnost balansnoj grupi, uključujući i njihove izmjene, prije početka primjene novog ugovora.
- (11) Novi snabdjevač, sa kojim je kvalificirani kupac, prema saglasnosti operatora sistema iz stava (6) ovog člana, zaključio novi ugovor, odmah po zaključenju ugovora dostavlja primjerak ugovora operatoru sistema i balansno odgovornoj strani, u skladu sa odredbama Općih uvjeta za isporuku i snabdijevanje električnom energijom, mrežnih pravila, tržišnih pravila i ugovora o balansnoj odgovornosti.
- (12) Novi snabdjevač može prilikom dostavljanja ugovora izostaviti komercijalne ili povjerljive podatke ili zatražiti zaštitu njihove povjerljivosti.
- (13) Postupak promjene snabdjevača ne može trajati duže od 21 dan.

Član 26.

(Osporavanje promjene snabdjevača)

- (1) Postojeći snabdjevač čiji ugovor o snabdijevanju prestaje važiti može osporiti prestanak važenja ugovora u skladu sa odredbama tog ugovora.
- (2) Postojeći snabdjevač čiji ugovor o snabdijevanju prestaje važiti, ne može postavljati posebne dodatne uvjete koji nisu obuhvaćeni ugovorom, uključujući neplaćene obaveze i dužan je da nastavi snabdijevanje kvalificiranog kupca sve do okončanja postupka promjene snabdjevača, o čemu će ga obavijestiti operator distributivnog sistema.

Član 27.

(Promjena snabdjevača u slučaju gubitka snabdjevača)

- (1) Kupac iz kategorije domaćinstva i mali kupac ima pravo na snabdijevanje u krajnjoj nuždi, u skladu sa članom 8. ovog pravilnika, u trajanju do 60 dana u slučaju kada

snabdjevač kojeg je kupac slobodno izabrao ne vrši snabdijevanje ili ne može da vrši snabdijevanje električnom energijom iz sljedećih razloga:

- a) stečaja ili likvidacije snabdjevača koji ga je do tada snabdijevao,
 - b) prestanka ili oduzimanja licence snabdjevaču koji ga je do tada snabdijevao,
 - c) da nije našao novog snabdjevača koji će ga snabdijevati nakon prestanka ugovora o snabdijevanju sa postojećim snabdjevačem, osim ako je prestanak ugovora posljedica neizvršavanja obaveza plaćanja isporučene električne energije.
- (2) U slučaju iz stava (1) tač. a) i b) ovog člana snabdjevač koji prestaje sa radom dužan je odmah obavijestiti operatora sistema i nadležnog regulatora o vremenu i razlozima prestanka rada, a operator distributivnog sistema dužan je obavijestiti pružaoca usluge snabdijevanja u krajnjoj nuždi o nastalim okolnostima.
 - (3) Kupac iz stava (1) tačka c) ovog člana dužan je da najkasnije sedam dana prije dana prestanka ugovora o snabdijevanju sa postojećim snabdjevačem, obavijesti pružaoca usluge snabdijevanja u krajnjoj nuždi i operatora distributivnog sistema o namjeri da koristi navedenu uslugu snabdijevanja i zaključi ugovor.
 - (4) Po prijemu obavijesti iz stava (2) ovog člana, operator distributivnog sistema je dužan da odmah izvrši očitavanje mjernog uređaja i dostavi podatke o stanju obračunskih veličina pružaocu usluge snabdijevanja u krajnjoj nuždi.
 - (5) Pružalac usluge snabdijevanja u krajnjoj nuždi i kvalificirani kupac dužni su da nakon prijema podataka o stanju obračunskih veličina od operatora sistema, zakluče ugovor.
 - (6) Za kvalificiranog kupca iz stava (1) ovog člana koji nakon isteka perioda od 60 dana ne zaključi ugovor o snabdijevanju sa novim snabdjevačem, obustavlja se isporuka električne energije.

Član 28.

(Informacije o snabdjevačima)

- (1) Lista snabdjevača koji posjeduju odgovarajuću licencu (dozvolu) nalazi se na internet stranici DERK-a.
- (2) Listu snabdjevača u istoj formi koju objavljuje DERK, dužno je putem svog pozivnog centra i na vidno istaknutim mjestima u svojim prostorijama objavljivati Javno preduzeće za komunalne djelatnosti "Komunalno Brčko" d.o.o. u funkciji operatora distributivnog sistema.

VII PRIJELAZNE I ZAVRŠNE ODREDBE

Član 29.

(Procedura izbora javnog snabdjevača)

Javni snabdjevač u Brčko Distriktu BiH je Javno preduzeće za komunalne djelatnosti "Komunalno Brčko" d.o.o., dok nadležni organ ne provede proceduru izbora javnog snabdjevača.

Član 30.

(Nadzor tržišta električne energije)

Nadzor funkcioniranja tržišta električne energije u Brčko Distriktu BiH obavlja DERK.

Član 31.
(Rok za donošenje propisa)

Metodologija za izradu tarifa u Brčko distriktu BiH uskladit će se sa odredbama ovog pravilnika u roku od šest mjeseci od dana stupanja na snagu ovog pravilnika.

Član 32.
(Postojeći propisi)

U slučaju neslaganja odredbi ovog pravilnika sa odredbama drugih podzakonskih akata koji reguliraju djelatnost snabdijevanja kupaca električnom energijom u Brčko Distriktu BiH, primjenjivat će se odredbe ovog pravilnika.

Član 33.
(Stavljanje propisa van snage)

Stupanjem na snagu ovog pravilnika prestaje važenje Odluke o snabdijevanju kvalificiranih kupaca električnom energijom u Brčko Distriktu Bosne i Hercegovine (“Službeni glasnik BiH”, broj 89/11).

Član 34.
(Stupanje propisa na snagu)

Ovaj pravilnik stupa na snagu osmog dana od dana objave u “Službenom glasniku BiH”, a objavit će se i u službenim glasilima entiteta i Brčko Distrikta Bosne i Hercegovine.

Broj: 04-02-2-311-9/13
14. novembra 2013. godine

Tuzla

Predsjedavajući Komisije

Mirsad Salkić